

տէի հրահանգները պարտադիր են Հայաստանի Կոմիտէի համար, և սա պէտք է ի կատար ածէ, եթէ հակառակ էլ լինի: Ահա իսկական պատկերը գործի, որ ըմբռնել է կառավարութիւնը և միջոցներ է ձեռք առել, բայց, ցաւօք սրտի, կիսատ: Պէտք է կուել ամբողջ կազմակերպութեան դէմ, որպէսզի նա հնար չունենայ ոյժ դառնալու»:

Այս հարցապնդման առթիւ տեղի ունեցած վիճարանութիւններից երեք խնդիր դառնում էր ակնյայտնի ու անհերքելի. նախ՝ որ հայ կոմունիստները Հայաստանի սահմաններում կատարում են գործօն աշխատանք՝ պետական յեղաշրջում առաջ բերելու նպատակով, երկրորդ՝ որ բոլշևիկները և թիւրքերի միջև գոյութիւն ունի իրական համաձայնութիւն, որի հետևանքով թիւրքերը պարտաւորուել են օգնել բոլշևիկներին Դէնիկինի դէմ, և, հետևաբար՝ երրորդ՝ բոլշևիկներին օգնութեան գնալիս՝ թիւրքերը պէտք է անցնեն Հայաստանի վրայով՝ նոր քայքայումների ու կոտորածի մատնելով մեր երկիրը:

Հայաստանում առանձնապէս մեծ անհանգստութիւն պատճառեց բոլշևիկ-քեմալական գործակցութիւնը: Հայ կոմունիստները վրդովուածով հերքում էին այդպիսի գործակցութեան գոյութիւնը, և մամուլի մէջ տարածւած լուրերը համարում էին «դաշնակների պրովոկացիայի» արդիւնք: Այն օրերին հայ բոլշևիկները զեռ ամօթ էին համարում բարեկամութիւնը թիւրք ջարդարարների հետ: Յետոյ՝ ժամանակները փոխւեցին—փոխւեցին և բարքերը...

Հայաստանի կառավարութիւնը, ինչպէս և Դաշնակցութեան բարձրագոյն մարմինը մէկից ակելի անդամներ քննութեան առաւ բոլշևիկ-քեմալական համաձայնութեան փաստը, ինչպէս և այդ փաստից բխելիք հետևանքները: Պարզ էր, որ համաձայնութեան մէջ, ուղղակի կամ անուղղակի ձևով որոշ տեղ պէտք է ունենար և՛ Հայաստանը հէնց, թէկուզ, իր աշխարհադրական դիրքի պատճառով: Իրերի առարկայական ընթացքը թելադրում էր միջոցներ ձեռք առնել, որպէսզի ապագայ իրադարձութիւնների պարագային՝ հայ ժողովուրդը ոտքի տակ չդնայ: Այս մտահոգութեամբ, Դաշնակցութեան Բիւրօն, յունւարի սկզբներին Թիֆլիս ուղարկեց իր անդամներից երեքին — Ա. Ջամալեանին, Ռ. Տէր-Մինասեանին և Ս. Վրացեանին, որպէսզի յարաբերութեան մէջ մտնեն Ռուսաստանի կոմունիստական կուսակցութեան կովկասեան բիւրօի հետ և պարզեն վերոյիշեալ հարցի մանրամասնութիւնները, ինչպէս նաև այդ հարցից բխելիք գործնական հնարաւորութիւնները: Յայտնի էր, որ բոլշևիկները ղեկավարութեան կենտրոնը Թիֆլիսում էր, ուր գաղտնի ապրում էին մի շարք աչքի ընկնող կոմունիստ գործիչներ: Հ. Յ. Դ. Բիւրօի անդամները մեկնեցին Թիֆլիս՝ ունենալով իրենց հետ բոլշևիկ-քեմալական համաձայնագրի պատճէնը:

Տեսակցութիւնը տեղի ունեցաւ Կովկասեան Բիւրօի ընդհանուր քարտուղար Հ. Նաղարէթեանի հետ, և, վերջին հաշւով, խիստ ճնշիչ տպաւորութիւն թողեց: